

Edin Halapić

**NAUČNI SKUP „MUSTAFA IMAMOVIĆ – 45 GODINA
NAUČNOG I PUBLICISTIČKOG RADA“**

(Gradačac, 23-25. oktobra 2009. godine)

**SCIENTIFIC GATHERING: MUSTAFA IMAMOVIĆ – 45
YEARS OF SCIENTIFIC AND PUBLISHING ACTIVITIES**

(Gradačac, October, 23 – 25 2009)

Sažetak

Tekst je osvrt na Naučni skup „Mustafa Imamović – 45 godina naučnog i publicističkog rada“ održanog u Gradačcu od 23. do 25. oktobra 2009. godine, koji govori o naučnom i publicističkom radu prof. dr. Mustafe Imamovića, redovnog profesora Pravnog fakulteta u Sarajevu.

Summary

The text comments on the Scientific Gathering: Mustafa Imamović – 45 Years of Scientific and Publishing Activities, held in Gradačac, from October 23 to October 25 2009, which focused on the scientific and publishing work of Mustafa Imamović, a full time professor at the Sarajevo Faculty of Law.

Povodom obilježavanja naučnog i publicističkog rada redovnog profesora Pravnog fakulteta u Sarajevu Mustafe Imamovića održan je naučni skup u Gradačcu u periodu od 23. do 25. oktobra 2009. godine. Skup je održan pod naslovom «Mustafa Imamović – 45 godina naučnog i publicističkog rada». Organizatori skupa su Javna naučna ustanova Institut

za istoriju Sarajevo i JU Javna biblioteka «Alija Isaković» Gradačac. Organizaciju skupa pomogli su TKD «Šahinpašić» d.o.o. Sarajevo i IKD «University Press» d.o.o. Sarajevo.

Mustafa Imamović rođen je 29. januara 1941. godine u Gradačcu. Diplomirao je na Pravnom fakultetu Univerziteta u Beogradu 1963. godine i iste te godine imenovan za asistenta na Istorijsko-pravnoj katedri Pravnog fakulteta u Beogradu. Na tom fakultetu magistrirao je 10. aprila 1967. godine odbranivši temu «Pravni položaj vjerskih zajednica za vrijeme Šestojanuarske diktature»¹, a doktorirao 2. jula 1971. godine s disertacijom «Pravni položaj i unutrašnjo-politički razvitak Bosne i Hercegovine 1878-1914. godine». Na Pravnom fakultetu u Sarajevu zaposlen je od 1973. godine. Bogata akademska karijera, kao i veliki naučni doprinos, bili su povodom za organizaciju naučnog skupa. Navođenje svih članaka, studija, rasprava, udžbenika, monografija i mentorstva na magistarskim radnjama i doktorskim disertacijama zahtijeva znatno veći prostor. Možemo spomenuti da je profesor Mustafa Imamović za svoj naučno-nastavni rad dobitnik niza značajnih priznanja, od kojih možemo navesti nagradu za najboljeg autora za 2008. godinu. Nagradu je dobio od Udruženja izdavača i knjižara BiH za djelo «Knjige i zbivanja».

Po svojoj strukturi skup se sastojao od tri sesije. To su: I. Mustafa Imamović – naučni doprinos, II. Historijsko-pravne teme, i III. Bosna i Hercegovina državno-pravna i kulturna historija.

Otvaranju skupa prethodila je pres-konferencija i pozdravna riječ organizatora skupa. Svečano otvaranje počelo je 24. oktobra promocijom edicije *Građa za bibliografiju Mustafe Imamovića*. Priređivači edicije su stručni saradnici biblioteke Pravnog fakulteta u Sarajevu Mirela Rožajac-Zulčić i Ivana Teronić. Izdavači su University Press i Magistrat iz Sarajeva. Ova edicija sadrži 599 bibliografskih jedinica koje su hronološki prikazane. Uvidom se dolazi do saznanja da naučni i publicistički rad profesora Mustafe Imamović datira iz 1964. godine.

Prava sesija skupa pod naslovom Mustafa Imamović – naučni doprinos okupila je šesnaest učesnika, koji su ukazali na naučni rad i doprinos

¹ Tokom 2008. godine objavljena je knjiga pod naslovom *Vjerske zajednice u Bosni i Hercegovini i Jugoslaviji između dva svjetska rata*. Ova knjiga predstavlja prerađenu i dopunjenu magistarsku tezu odbranjenu na Pravnom fakultetu Univerziteta u Beogradu 1967. godine.

Mustafe Imamovića. Učesnici su bili dr. Husnija Kamberović, dr. Edsad Duraković, dr. Enes Karić, dr. Enes Pelidija, dr. Šaćir Filandra, dr. Abid Dozić, dr. Marina Katnić-Bakarišić, dr. Edin Mutapčić, dr. Dževad Drino, dr. Enes Durmišević, mr. Edin Ramić, mr. Rusmir Djedović, dr. Selim Hasović, mr. Amra Mahmutović i Šejla Maslo, mr. Sanjin Bandović i dr. Robert Donia. Učesnici su kroz svoje referate ukazali na to da je profesor Imamović najznačajniji historičar ne samo u Bosni i Hercegovini nego i šire, te da je u svom radu istakao svestranu dosljednost. U radu prve sesije učestvovali su i oni kojima je profesor Imamović bio mentor kako na magistarskim tezama tako i na doktorskim disertacijama.

Druga sesija orijentirala se na pravno-historijske teme i tu je podneseno deset referata. Učesnici sesije su bili dr. Magdalena Apostolova, dr. Obrad Stanojević, dr. Srđan Šarkić, dr. Vilma Pazelj, dr. Mirela Šarac, mr. Edin Halapić, mr. Samir Aličić, dr. Željko Radić, Joško Pavković i dr. Thomas Simon. Ova sesija okupila je i učesnike iz inostranstva (Hrvatska, Srbija, Austrija), a neki od njih su i dugogodišnji saradnici profesora Imamovića. Kod održavanja skupa pristupilo se čitanju referata onih učesnika koji su bili spriječeni da prisustvuju naučnom skupu.

Treća i završna sesija skupa, pod naslovom Bosna i Hercegovina državno-pravna i kulturna historija okupila je deset učesnika. To su bili dr. Ivo Banac, dr. Ivan Balta, dr. Josip Vrbošić, dr. Elvira Islamović, mr. Seka Brkljača, dr. Ljubomir Zovko, mr. Jasmin Branković, Alem Hodžić, Amir Duranović i Mirza Huljić. Kao što je to bio slučaj s drugom sesijom, i ova je okupila učesnike iz inostranstva i bliske saradnike profesora Imamovića. S obzirom na to da je tokom naučnog skupa izlagano preko trideset referata, teško je izdvojiti one koji bi mogli ponijeti titulu najboljeg ili najznačajnijeg. U odvijanju skupa nakon okončanja svake sesije bilo je predviđeno vrijeme za otvorena pitanja, diskusije i zaključke.

Organizacijom naučnog skupa u čast profesora Mustafe Imamovića i njegovog naučno-publicističkog rada, grad Gradačac odabrao je najbolji način da ukaže dužno poštovanje prema ličnosti i radu profesora Imamovića.

Kao konačan rezultat naučnog skupa, očekuje se izdavanje posebne edicija koja bi objedinila sve referate i tako osigurala trajni dokaz o naučno-publicističkom i istraživačkom djelu Mustafe Imamovića.